

Ռամկավար Ազատական Կուսակցության Ողջոյնի Խօսքը՝
Սփիւռքի Կազմակերպութիւններու Ղեկավարներու եւ
Ներկայացուցիչներու Համահայկական Համաժողովին
(19-20 Սեպտեմբեր, 2011)

Երեկ՝ Երկուշաբթի, Սեպտեմբեր 19-ին, քաղաքամայր Երեւանի Կարէն Դեմիրճեանի անուան մարզահամերգային համալիրի «Հայաստան» դահլիճին մէջ տեղի ունեցաւ Համաժողովի հանդիսաւոր բացումը: Հայաստանի Հանրապետութեան Նախագահի խօսքին յաջորդեցին Ամենայն Հայոց եւ Տանն Կիլիկոյ Կաթողիկոսներու օրհնութեան խօսքերը, Լեւոնային Ղարաբաղի Հանրապետութեան նախագահի ողջոյնի խօսքը, Հայ Կաթողիկէ Եկեղեցոյ եւ Հայ Աւետարանական Եկեղեցիի ողջոյնները, հայկական աւանդական երեք կուսակցութիւններու գերագոյն ղեկավարներու ելոյթները, որոնց յաջորդեցին Հ.Բ.Ը.Միութեան, ինչպէս նաեւ Ռուսաստանի Հայերի Միութեան նախագահի ողջոյնները:

Ստորեւ՝ Ընկեր ՄԱՅՔ ԽԱՐԱՊԵԱՆ-ի ելոյթը.

Նորին Վսեմութիւն Սերժ Սարգսեան, նախագահ Հայաստանի Հանրապետութեան, Նորին Վսեմութիւն Բակօ Սահակեան, նախագահ Լեւոնային Ղարաբաղի Հանրապետութեան, Գարեգին Բ., Ամենայն Հայոց եւ Արամ Ա., Մեծի Տանն Կիլիկոյ Վեհափառ Հայրապետեր, հոգեւոր հայր Հայ Կաթողիկէ Եկեղեցոյ, յարգելի Վերապատուելի Հայ Աւետարանական Եկեղեցիի, Հայաստանի եւ Լեւոնային Ղարաբաղի Հանրապետութեանց պաշտօնակատարներ, սիրելի գործընկերներ,

Հայաստանի Հանրապետութեան անկախութեան եւ Լեւոնային Ղարաբաղի Հանրապետութեան հռչակման քսանամեակի ոգեշնչող այս օրերուն, Հայոց Յեղասպանութեան հարիւրամեակին ընդառաջ եւ հայ ժողովուրդին առջեւ ծառացող բարդ խնդիրներուն դիմաց, Ռամկավար Ազատական Կուսակցութեան անունով կ'ողջունեմ բոլորս եւ համայն հայ ժողովուրդը ամենուրեք, նաեւ՝ բոլոր անոնք որոնք դրական զգացումներ կը տածեն հայութեան հանդէպ:



Ընկեր Մայք Խարապեան

Միքելիներ, այս համաժողովը կը հաստատէ թէ հայութիւնը անզիջում կերպով նախանձախնդիր է ազգային գերագոյն մեր շահերու եւ հիմնարար արժէքներու նկատմամբ եւ ամբողջովին տոգորուած է Հայաստանի եւ Լեռնային Ղարաբաղի հանրապետութեանց հայկական յաւիտենականութեան եւ այդ գոյգ սրբութիւններու, ինչպէս նաեւ Սփիւռքի յարաճուն յառաջընթացի տեսլականով:

Մեր փափաքը եւ միաժամանակ նաեւ մեր հաւատքն է, որ այս համաժողովը, ողջմիտ քննարկումներով, եւ հիմնուելով անցեալի փորձի վրայ, պիտի յաջողի մշակել համահայկական գերագոյն շահերու համար այնպիսի համակարգ մը, եւ պիտի որդեգրէ ռազմավարական դերաբաշխումի թէ այլ այնպիսի միջոցառումներ, որոնք անկիւնադարձային լիցք պիտի հաղորդեն եւ նոր, զօրացած թափ պիտի պարգևեն բոլորիս՝ բարուք լուծումներ գտնելու համար ազգովին մեր դիմագրաւած ծանրակշիռ խնդիրներուն:



Տեսարան մը բացման հանդիսութենէն

Իսկ հայութեան դիմագրաւած հիմնախնդիրները բազմազան են ու տարաբնոյթ:

Ա. Կարենալ յաղթահարելու համար Հայաստանի Հանրապետութեան եւ մեր ժողովուրդի գոյութեանն իսկ սպառնացող այլեւայլ դժուարութիւնները, առաջնահերթ կերպով անհրաժեշտ է որ մեր երկրէն ներս կատարելագործենք ու մնայուն, անձեռնմխելի արժէքներու վերածենք խօսքի եւ հաւատամքի ազատութեան, մարդկային իրաւունքներու պահպանման, ազատ ու թափանցիկ ընտրութիւններու եւ մասնաւորաբար

արդարադատութեան հիմնադրոյթները: Ապագայի նկատմամբ մեր ժողովուրդին ունեցած հաւատքն ու յոյսը կարելորագոյն գրաւականներ են ի խնդիր յաւերժական հայութեան:

Բ. Հայ ժողովուրդի հայրենաբնակ, Արցախի եւ արտերկրի հատուածները, ներկայիս, իրարու հետ առաւելաբար կապուած են լեզուով, պատմութեամբ եւ մշակոյթով: Անհրաժեշտ է նախաձեռնել ծրագրեալ բազմաթիւ ու բազմապիսի միջոցառումներ, որոնք մեր ժողովուրդի բոլոր հատուածները իրարու անքակտելի կերպով պիտի կապեն, պիտի զօդեն նաեւ սիրտով, միտքով եւ հոգիով:

Գ. Հայկական սփիւռքը ամէն ճիգ ի գործ պէտք է դնէ օժանդակելու համար հայրենիքի յարատեւ հզօրացման եւ բարգաւաճման գործընթացին: Մեր ըղձանքը եւ միաժամանակ նաեւ անսակարկելի նպատակակէտն է՝ որ հայրենի մեր ժողովուրդը ապրի լաւ, հանգիստ ու ապահով պայմաններու ներքոյ: Գերազանցապէս բաղձալի այս վիճակը կտրականապէս կը բացառէ նաեւ հայրենիքէն արտագաղթի հոգեմաշ երեւոյթը:

Դ. Քաղաքականօրէն հզօր հեղինակութիւն ունեցող երկիրներու մէջ (ինչպէս՝ Միացեալ Նահանգներ, Ֆրանսա, եւ այլն) տեղւոյն, հայկական ծագումով, բոլոր քաղաքացիներու քուէները միաւորելով, պէտք է կեդրոնացնենք ու, միանուագ կերպով, տրամադրենք Հայաստանի Հանրապետութեան Նախագահին, որպէսզի տուեալ երկիրներու գերագոյն ղեկավարները մեր Նախագահին ներկայանան աւելի խնդրողի դերով, քան թէ՛ պահանջողի:

Ե. Այս բոլորը, ուղղակի թէ անուղղակի կերպով ճանապարհ կը հարթեն որ Հայոց Յեղասպանութեան համաշխարհային եւ նոյնիսկ Թուրքիոյ կողմէ ճանաչման ու հատուցման կարելիութիւնները դառնան աւելի իրատեսական:

Մեր մէկ ու կէս միլիոն զոհերու յիշատակի ճշմարիտ յարգումին, պապենական, այլ բռնախլուած մեր բոլոր հողերուն, կորած հազարամեայ մշակութային արժէքներուն ի խնդիր՝ պէտք է կեանքի կոչել պահանջատիրութեան համազգային ամբողջական, լիարժէք եւ անզիջում ռազմավարութիւն մը: Այլ խօսքով, բոլորս միասնաբար, պարտինք քաղաքական ու գիտական նոր որակ ու թափ հաղորդել Հայ Դատի պահանջատիրութեան, աւելի մասնագիտացած մօտեցում ցուցաբերել Յեղասպանութեան աւերի հաշուառման, աւելի հետեւողականօրէն հետապնդել Հայ Դատի կապակցութեամբ, միջազգային օրէնքի համակարգով, ուսումնասիրուած դատական թղթածրար պատրաստելու անյետաձգելի աշխատանքները, դատական հայց բարձրացնելու անմիջական նպատակով Միջազգային Ատեաններու առաջ:

Հայ Դատը անժամանցելի է. Ո՛չ ժամանակը, ո՛չ ալ նոյնիսկ որեւէ գեր-ոյժ կրնայ զայն փակուած նկատել, այնքան ատեն որ Յեղասպանութեան պահանջատէր հայութիւնը,

համադրաբար կը գործէ փոխ-ըմբռնումի եւ փոխ-ամբողջացման՝ յատուկ կերպով մշակուած, համազգային ռազմավարութեամբ:

Մենք միասնաբար կրնանք եւ պիտի՝ իրականացնենք հայ ժողովուրդի Մեծ Երազը:

Զ. Նկատի ունենալով որ, մօտիկ անցեալին, հայապատկան շատ թանկարժէք բազմաթիւ կալուածներու սեփականութիւնը անցաւ օտար պետութիւններու, տեղաբնակ հայութեան նօսրացումին պատճառով (ինչպէս՝ Հնդկաստանի մէջ) եւ ներկայիս նոյնպիսի վտանգ կը սպառնայ Երուսաղէմի, Եգիպտոսի մէջ եւ այլուր գտնուող հայապատկան չափազանց արժէքաւոր կալուածներու եւ այլ հարստութիւններու, անհրաժեշտ է որ անմիջապէս կեանքի կոչուի Հայաստանի մէջ արձանագրուած ձեռնարկութիւն մը (TRUST), զոր գլխաւորողները ըլլան Հայրենի իշխանութիւնը եւ եկեղեցին եւ որուն փոխանցուին սփիւռքի անխտիր բոլոր հայապատկան (ոչ-անձնական) ստացուածքներու սեփականութիւնները:

Է. Հայկական Սփիւռքը Հայաստանի համար անփոխարինելի հարստութիւն մըն է: Այս իսկ համոզումով, բայց նաեւ մեկնելով ազգային մեր գերագոյն այլ շահերէն, արտերկրի մէջ պէտք է բազմապատկենք ազգապահպանման մեր ճիգերը, վերանորոգ թափ, նոր երանգ եւ նոր որակ շնորհելով անոնց: Գոյութիւն ունին, անշուշտ ոմանք, որոնք կորսնցուցած են այս ուղղութեամբ իրենց ունեցած հաւատքն ու եռանդը: Այդպիսիները, թելադրելի է, որ ասպարէզը թողուն ու հեռանան, որպէսզի, նոյնիսկ նուազագոյն իսկ չափով, չխաթարուին հայապահպանումի նուիրական առաքելութեան ի խնդիր տարուող բոլոր աշխատանքները:

Մեր սրբազան հայրենիքին, անոր հերոսական ժողովուրդին, անոր պետականութեան ամրապնդումին լաւագոյնս ծառայելու համար, մեր իղձը եւ անընկճելի նպատակն է գոյատուրը հայկական համերաշխ, հզօր, երկարակեաց եւ միացեալ Սփիւռքի մը: Ռամկավար Ազատական Կուսակցութիւնը ամբողջովին յանձնառու է ազգօգուտ այս առաքելութեան:

Կեցցե՛ Հայ ժողովուրդը:

Կեցցե՛ն Հայաստանի եւ Լեռնային Ղարաբաղի Հանրապետութիւնները: